

Opitz, Martin: An eine Jungfraw (1624)

1 Vmb alles Gut vnd Gelt in diesem gantzen Lande
2 Sag ich noch euch/ Jungfraw/ noch andern was zu schande/
3 Vnd wolte Warlich nicht/ daß jemandt sprechen solt/
4 Ich wolt jhn nur auß Haß verkleinern vnverschuldt/
5 Ihr möget aber doch darneben künlich gleuben/
6 Daß ich ohn euch/ Gott lob/ wol werde leben bleiben/
7 Ich will derhalben auch mich nimmer vnderstehn/
8 Von wegen ewrer Huldt mit Lugen vmbzugehn/
9 Diß alles laß ich euch die Hoffeleuth erzeigen/
10 Die sonst zimlich hoch mit reden können steigen/
11 Die jedes Wort auffziehen mit sonderlichem schein/
12 Auff daß sie desto mehr in ewrer Gnade sein.
13 Sie thun wol einen Eydt/ doch nicht ohn heimlich lachen/
14 Daß ewer äugelein die Sonne finster machen/
15 Vnd daß sie Sternen sein am hellen Firmament/
16 Von denen Frewd vnd Leyd zu jhnen wirdt gewendt/
17 Sie schwören hoch vnd thewr/ daß Gott euch außerlesen/
18 Vor aller Zierligkeit/ vor allem schönen Wesen/
19 Vnd sagen/ seelig sey das Jahr vnd denn die Zeit/
20 In der jhr grosse Zier der Welt geboren seit/
21 Sie sprechen wol darbey/ daß jhr durch bloß anblicken/
22 Auch ein Gemüt von Stein vermöget zu entzücken/
23 Daß auß America die beste Specerey
24 Mit ewrem Athem weit nicht zuvergleichen sey.
25 Daß schöner Hände nicht gemahlet werden künnten/
26 Daß gegen jhnen Schnee zugleichen sey der Dinten/
27 Daß iedes Zänlin sey ein köstlicher Demant/
28 Das die Natur daran all jhre Kunst gewant.
29 Vnd daß die Lippen auch/ so als die Rosen blühen/
30 Weit sein den Edelsten Corallen vorzuziehen/
31 Das Haar (ich glaube nicht daß es von Hertzen kümpt)
32 Ein jeglicher vor Golt vnd beste Perlen nimpt.
33 Sie setzen wol hinzu/ wann sie euch reden hören/

34 Daß auch ein jedes Wort jhr Hertze thu versehren/
35 Vnd daß der starcke Mars durch ewre Liebligkeith
36 Die Waffen abzuthun euch würde sein bereit.
37 Geliebet euch hernach von Venus was zusingen/
38 Die Winde könnet jhr durch ewre Stimme zwingen/
39 Vnd wann jhr weiter auch euch zu der Lauten findt/
40 Ist Orpheus vngelehrt/ vnd gegen euch ein Kindt.
41 Wann jhr zu Felde kompt wohin man euch sicht gehen/
42 Da sicht man auch zugleich die schönsten Blumen stehen/
43 In summa/ die Natur hat diß an euch get han/
44 Daß ewre Treffligkeit kein Mensch beschreiben kan.
45 Wie möcht ich aber wol zuhören diesem allen/
46 Vnd auch vor Lachen nicht für meine Füße fallen/
47 Ich glaube wer das Thun nur halb beschreiben wolt/
48 Er Feder vnd Papir auch schamroth machen solt.
49 Vnd was dann mich belangt/ bin ich gar nicht der Sinnen/
50 Daß ich so ewre Gunst verhoffte zugewinnen/
51 Mein Hertz ist auch noch nicht so trefflich sehr entzündt/
52 Daß ich jhm noch zur Zeit nicht widerstehen kündt.
53 Ich sage freylich wol/ vnd weiß es wahr zumachen/
54 Daß jhr gar rein vnd steiff bewahret ewre Sachen/
55 Vnd daß jhr sehr viel sein voll Hoffart/ stoltz vnd pracht/
56 Die jhr gar weißlich doch nicht sonders habt in acht.
57 Daß ich euch aber auch vor Göttlich solt erkennen/
58 Man möcht es/ fürcht ich nur/ wol Traum vnd Lügen nennen/
59 In ewrem Leichnam lebt zwar alle Zierligkeit/
60 Doch auch nicht wenig ist dem Himmel trefflich weit.

(Textopus: An eine Jungfraw. Abgerufen am 23.01.2026 von <https://www.textopus.de/poems/10649>)